

Prezidénsia Konsellu Ministrus

VIII Governu Konstitusionál

Komunikadu Imprensa

Sorumutuk Estrordináriu Konsellu Ministrus nian iha loron 15 fulan-marsu tinan 2021

Konsellu Ministrus hala'o sorumutuk iha Ministériu Finanzas, iha Dili no, hafoin halo análize ba apresentasaun husi koordinador sira Sentru Integradu Jestaun Krize nian, kona-ba pontu situasaun epidemiológika iha Timor-Leste, aprova ona projetu Rezolusaun Governu nian atu **mantein serka sanitária ida iha Munisípiu Dili, to'o tuku 23:59 iha loron 2 fulan-abril tinan 2021.**

Nune'e, postu fronteira sira ne'ebé instala iha área munisípiu ne'e kontinua taka no bandu sirkulasaun ema nian entre munisípiu ne'e ho sirkunskrisaun administrativa sira-seluk, exetu iha kazu ho fundamentu forte tanba razaun seguransa públika, saúde públika, assisténsia umanitária, manutensaun husi sistema abastesimentu públiku, ka razaun seluk ne'ebé presiza atu hala'o ba interese públiku nian. Pedidu sira ba sirkulasaun entre Munisípiu Dili no sirkunskrisaun administrativa sira-seluk dirije husi interesadu ba Diretór Sentru Integradu Jestaun Krize, no preferensialmente apresenta liuhusi enderesu korreiu eletróniku.

Ema no sasán ne'ebé, bazeia ba regra sira ne'ebé prevee ona iha Diploma ida ne'e, sei tama ka sai husi Munisípiu Dili,, tenke tranzita liuhusi sentru kontrolu integradu ida ne'ebé lokaliza iha entrada terrestre leste, sentru no oeste, no iha postu fronteira tasi no aérea. Sentru kontrolu integradu hirak ne'e funsiona iha segunda, kuarta no sesta, entre tuku 06:00 dadeer to'o tuku 16:00 loro-kraik, no ninia funsionamentu aseguara husi ekipa funsionáriu, ajente ka traballador sira administrasaun públika nian ne'ebé sei nomeia husi Ministru Interiór, Ministra saúde, Ministru Administrasaun Estatál no Ministru Agrikultura no Peskas, ne'ebé sei informa Diretór Sentru Integradu Jestaun Krize kona-ba identidade no sira-nia kontaktu.

Kondutór no tripulasaun seluk husi veíkulu ne'ebé hetan autorizasaun atu tula sasán ne'ebé atu mai Dili, ka sira ne'ebé atu sai husi Dili, hapara ninia atividade iha sentru kontrolu integradu, no iha ne'ebá substitui husi kondutór ka tripulasaun seluk, no la hanesan, ne'ebé sei garante kontinuasaun transporte ne'e nian. Molok hala'o substituisaun kondutór no tripulasaun sira, ekipa husi sentru kontrolu integradu hamoos karreta laran ne'e, liuliu parte iha ne'ebé kondutór no tripulasaun sira ne'e tenke hela, tuir norma sira ne'ebé sei aprova husi diploma ministeriál husi Ministra Saúde nian.

Iha kazu ne'ebé sirkulasaun sasán hala'o liuhusi transporte tasi ka aéreu nian, ninia tripulasaun tenke mantein iha roo no aviaun laran, ka, bainhira la posivel, sira labele sai husi zona internasionál portu ka aeroportu nian, tenke uza máskara hodi takaibun no inus, no tenke halo distansiamentu pelumenus metru ida husi ema seluk.

Aprova mós projetu Rezolusaun Governu nian ne'ebé **mantein impozisaun konfinamentu domisiliáriu jerál nian ba ema hotu ne'ebé mak oras ne'e daudaun hela iha Munisípiu Dili,** ne'ebé tenke hela iha sira nia uma ka iha sira nia alojamentu temporáriu.

Exesionalmente, ema bele sai husi iha sira-nia hela fatin ka husi sira nia alojamentu temporáriu bainhira tenke ba ospital, médiku no atu hetan ai-moruk; atu akompaña membru família ka ema ne'ebé nia maka tau matan, atu ba ospital, médiku no atu hetan ai-moruk, atu fó assisténsia ba ema seluk ne'ebé presiza ho razaun saúde, protesaun sosiál ka assisténsia umanitária; atu apresenta keixa ka denúnsia iha Ministériu Públiku, iha Provedoria Direitus Umanus no Justisa nian ka iha órgaun polisia kriminal saida de'it; atu komparese iha dilijénsia judisiál ka polisiál ba ne'ebé simu notifikasaun; atu sosa ai-han, refeisaun, sasán ba primeira nesesidade ka kombustivel; atu selu servisu eletrisidade, telekomunikasaun ka asesu ba internet nian; atu hetan asesu ba servisu finanseiru; atu halo atividade profisionál, bainhira superiór ierárkiku la fó dispensa, iha kazu funcionáriu, ajente ka traballadór administrasaun públika nian, ka bainhira entidade empregadora rasik la fó dispensa, iha kazu traballadór iha setór privadu ekonomia nian; atu partisipa iha funeral sira, tuir regra ne'ebé prevee iha Rezolusaun Governu nian ne'e.

Dezlokasaun hirak ne'e bele hala'o de'it durante tempu ne'ebé presiza tebes atu konkretiza objetivu dezlokasaun ne'e nian, no bainhira akontese tanba razaun serbisu, ema tenke lori dokumentu ne'ebé hatudu sira nia obrigasaun atu ba no hela iha serbisu fatin.

Bandu atu transporte públiku hala'o movimentu iha área sira hotu iha Munisípiu Dili, liuliu, mikrolete, biskota no taksi sira;

Estabelesimentu komersiál, industriál, artezanál no prestasaun servisu setór privadu ekonomia nian sira hotu ne'ebé desenvolve atividade iha munisípiu Dili, tenke taka ba públiku, exetu estabelesimentu komersiál sira ne'ebé fa'an ai-han, bee no sasán esensial seluk, liuliu supermerkadu, minimerkadu no kiós sira; estabelesimentu sira ne'ebé presta kuidadu médiku no fa'an ai-moruk; estabelesimentu sira ne'ebé presta servisu protesaun sosiál; farmásia sira; postu sira ba revenda kombustivel ka gás nian; estabelesimentu komersiál iha ne'ebé hala'o pagamentu ba forneseimentu enerjia elétrika, asesu ba internet ka telekomunikasoins; órgaun komunikasaun sosiál; estabelesimentu oteleiru no sira ne'ebé hanesan, tuir regra ne'ebé estabelese iha Rezolusaun Governu ne'e nian; restaurante, warung sira no sira ne'ebé hanesan, tuir regra ne'ebé estabelese iha Rezolusaun Governu ne'e nian; instituisaun finanseira, liuliu banku no entidade sira ne'ebé iha lisensa atu hala'o transferénsia internasionál osan nian; empreza konstrusaun sivíl ka atividade sira ne'ebé liga ho konstrusaun sivíl ne'ebé hetan adjudikasaun kontratu públiku nian sira; empreza sira ne'ebé presta servisu tékniku manutensaun, reparasaun ka funksionamentu ba sentrál sira produsaun enerjia elétrika nian ka rede elétrika nasional; empreza transporte karga nian liuhusi rai, tasi no aéreu nian; estabelesimentu sira ne'ebé fa'an materiál funeráriu ka presta servisu funeráriu nian, tuir regra ne'ebé hatuur iha Rezolusaun Governu ne'e nian; empreza sira ne'ebé presta servisu kontrolu peste nian (*pest control*); empreza sira ne'ebé presta servisu limpeza ba saneamentu no ezgotu sira.

Traballadór no kliente estabelesimentu komersiál no empreza sira ne'e nian, molok atu tama ba estabelesimentu komersiál ka empreza, tenke fase liman no taka inus hoibun ho máskara. Durante tempu ne'ebé sira sei hela iha estabelesimentu no empreza nia-laran, sira tenke kontinua uza máskara hodi taka inus hoibun, mantein distansiamentu sosiál husi pelumenus metru ida ho ema seluk, ho ne'ebé sira la hela hamutuk, iha ekonomia komún no sira tenke fase liman beibeik; Durante tempu ne'ebé sei hein atu tama ba estabelesimentu sira ne'e nian, kliente sira tenke hein iha li'ur, no mantein distánsia pelumenus metru ida ho ema seluk, ho ne'ebé sira la hela hamutuk, iha ekonomia komún.

Estabelesimentu komersiál, industriál, artezanál ka prestasaun servisu nian sira iha setór privadu ekonomia ne'ebé taka ba públiku, bele mantein sira-nia atividade liuhusi servisu entrega ba hela-fatin.

Restaurante no empreza ne'ebé hanesan bele fornese de'it hahán liuhusi opsaun atu lori ba uma ka ba fatin alojamentu temporáriu, no opsaun atu entrega ba uma ka otél. Ema ne'ebé hela iha otél sira tenke han iha nia kuartu rasik.

Merkadu Munisipál Dili nian, liuliu Merkadu Manleuana no Merkadu Taibesi, kontinua funsiona no operadór no utente ida-idak, molok tama ba merkadu sira ne'e, tenke fase liman no kontinua uza máskara hodi taka inus noibun, no mós mantein distánsia pelumenus metru ida ho ema seluk, ho ne'ebé sira la hela hamutuk, iha ekonomia komún. Bainhira forsa seguransa sira haree katak labele mantein distánsia sosiál pelumenus metru ida entre utente sira, sei impede utente foun sira atu tama ba resintu merkadu to'o númeru utente sira ne'e sufisiente atu kumpre distánsia ne'ebé refere ona.

Vendedór ambulante sasán ka servisu ba primeira nesiedade, liuliu produktu ai-han, espesialmente modo tahan, no mós komersiante ne'ebé hala'o atividade iha merkadu, tenke mantein máskara hodi taka inus noibun, tenke fase liman beibeik, no mantein distánsia pelumenus metru ida ho vendedór sira seluk no ho kliente sira, no sira mos tenke garante katak ema la halibur malu hamutuk iha fatin ne'ebé sira hala'o sira-nia atividade.

Bandu atu organiza no hala'o serimónia funerál nian iha ne'ebé ema liu na'in sanulu maka partisipa. Ema ne'ebé partisipa iha serimónia ne'e tenke uza máskara hodi taka inus noibun, no mantein distánsia pelumenus metru ida ho ema seluk ne'ebé partisipa iha serimónia ne'e.

Autoridade polisiál nian sira fiskaliza kumprimentu ba regra sira ne'ebé hatuur iha Rezolusaun Governu nian ne'e no aviza infratór sira katak se sira kontinua nafatin hodi la kumpre, ne'e bele konsidera prátika ba krime dezobediénsia nian ida. Autoridade polisiál sira sei komunika ba Ministériu Públiku identidade husi ema ne'ebé, hafoin avizu ne'ebé prevee iha fraze anterior, kontinua la respeita regra sira ne'ebé prevee iha Rezolusaun Governu ne'e nian. Karik regra sira ne'ebé prevee iha Rezolusaun Governu ne'e nian ema husi rai-li'ur maka la respeita, autoridade polisiál sei sira komunika sira nia identidade ba Servisu Migrasaun.

Konsellu Ministrus aprova mós projetu Rezolusaun Governu nian sira atu **impoin serka sanitária no konfinamentu obrigatóriu iha Munisípiu Baukau no Munisípiu Vikeke, to'o loron 29 fulan-marsu**. Regra aplikasaun nian sira ba serka sanitária no konfinamentu nian iha munisípiu rua ne'e, hanesan ho regra sira ba Munisípiu Dili nian, ho ajustamentu no adaptasaun sira ne'ebé presiza ba realidade munisípiu rua ne'e nian. **REMATA**

url: <http://timor-leste.gov.tl?lang=tp&p=27223>